

J. J.

DISPUTATIO INAUGVRALIS
MEDICO-CHIRVRGICA

DE

LVXATIONE
VERTEBRARVM,

Quam

PRÆSIDE

DEO TER OPTIMO
TER MAXIMO,

DECRETO

GRATIOSISSIMÆ

FACVLTATIS MEDICÆ
IN INCLYTA NORIBERGENSIVM VNI-
VERSITATE ALTDORFINA,PRO LICENTIA,
SVMMOS IN ARTE MEDICA
HONORES ET PRIVILEGIA DOCTO-
RALIA RITE OBTINENDI,*Publicæ placidæq; Φιλίας ventilationi*

ad d. 3. Junji A. MDCCVII.

H. L. Q. C.

subjiciet

TOBIAS DEGGELLERS,

Scaffusio - Helvetius.

THE NEW YORK PUBLIC LIBRARY
ASTOR LENOX TILDEN FOUNDATION

THE NEW YORK PUBLIC LIBRARY ASTOR LENOX TILDEN FOUNDATION

RECEIVED

APR 21 1901

THE NEW YORK PUBLIC LIBRARY
ASTOR LENOX TILDEN FOUNDATION

RECEIVED

APR 21 1901

THE NEW YORK PUBLIC LIBRARY
ASTOR LENOX TILDEN FOUNDATION



PRÆFAMEN.

QUam utilis, ne dicam necessaria, sit futuro Medico illa *Medicinæ* pars, quæ *Chirurgia* audit, experiuntur illi, qui ad ægros ejusmodi vocati, judicium suum suspendere coguntur: nec, uti nonnullis videtur, pro abjecta habendam, quia potius omni studio excolendam esse, celeberrimorum Doctorum testimonio comprobari posset; hanc præcipue ob causam, quoniam nonnunquam satis desperati, & Medico vel Chirurgo multum negotii facessentes casus observantur. Unde est, quod hodieq; *Academiæ* præsertim *Europæ* de *Viris* artem hanc probè callentibus sibi prospiciant, qui sese Professores *Chirurgiæ* nominari non verentur. Ex his autem non sequitur, Medico omnes & singulas operationes chirurgicas propria manu esse perficiendas; sufficit enim, si Medicus ad ægrum, morbo externo decumbentem, vocatus, sciat imperare, h. e. ut capax sit, Chirurgum, si qua in re erraverit, melius de operatione suscipienda instruere ac informare: rarum quippe non est, ut aliquando Chirurgi vel potius Chirurgastri in ejusmodi casibus nec principium nec finem quærere sciant, præsertim si *Anatomia* minus gnari existant. Inter casus chirurgiæ nonnunquam satis desperatos merito locum sibi vendicant *Luxationes* quædam, præprimis illæ, quibus *Vertebræ Spinae Dorsi* vexantur atq; affliguntur; quare consultum

salutem duximus, postquam per Dei gratiam examina consueta publica coram Gratosissima FACULTATE MEDICA sustinuimus, speciem quandam Luxationis Vertebrarum loco Thematicis Inauguralis pertractare, & quidem illam, quæ à causa quadam externa originem suam traxit: alteram vero jam alibi simili modo tractatam, brevitatis studio præterire. Faxit itaq; DEVS O. M. ut omnia cedant ad Divini Nominis sui gloriam, proximiq; egrotantis salutem.

THESES. I.

ORdini hætenus observato, ut insistam, ante omnia eruenda venit Etymologia vocis Luxationis, quam à Latinitate originem suam habere facile perspicimus; cum & το Luxare, a quo derivatur, natales inde suas deducat. An vero derivari debeat à luo, lucto, aut à luxu, Grammatici & Philologi extricent. Ejusdem etiam originis est Vertebra, à Vertendo nomen suum nata, quoniam corpori vario modo flectendo & torquendo inservit.

II.

Varia nunc utriusque vocis ostendenda occurrunt Synonyma; & quidem Latinis, Distorsio, Excidentia, Dislocatio, idem sunt, quod Luxatio: ut taceam membra luxata quibusdam chirurgis etiam vexata audire, unde apud Veteres præsertim toties Curæ Vexatorum fit mentio; Græcis vero ἐκπῶμα, ἐξάρθρωσις, ὀλίθη, ὀλίθημα dicitur, tandemque Germani appellant, eine Verrenkung / Verdrehung &c. Sic nec Vertebrae ex tribus hisce Linguis sua desunt Synonyma; licet Latina perpauca possideat, dicitur tamen quibusdam etiam Verticillum, Vertibulum, item Cardo: forsan quod in officio vel figura aliquo modo conveniant. Græca autem plu-
ra

ra suppeditat e. g. *απόνδυλος*, *ἀσπράχης*, *σπρίγγης*; Germanica sunt: Ein Gewärblein / Rückrads-Gelänck.

III.

Synonymiam excipit Homonymia, quam tamen sicco quasi pede transimus, cum nihil peculiare nobis obveniat; si quis autem in hunc censum vocare velit, pararthrema sive uti Latinis dicitur, Subluxationem, nobis perinde erit, nisi quod existimemus, illam potius ad Differentias pertinere, de quibus inferius suo loco plura dicemus. Cum voce Vertebra res eodem redit, unde vix opus erit, plura de his addere, quin potius arbitramur, properandum nobis esse ad realem harum vocum expositionem, quam in sequentibus tentabimus.

IV.

Antequam ad specialem aliquam Luxationis definitionem nos accingamus, pauca quædam circa generalem monenda, præmittemus: & quidem tentabimus aliqualem ejusdem descriptionem in medium proferre, hunc in modum, nimirum Luxatio in genere dicitur, quando ossis alicujus è propria sede in alienam fit emotio, sive deinde illa contingat in totum, sive aliqua saltem ex parte id acciderit, cum motus arbitrarii impeditio.

V.

Nunc agendum rimabimur paucis specialem, adeoque ipsius nostri affectus definitionem: Consultum vero nobis videtur, denuo in memoriam revocare, quod supra in præfatione monuimus: nempe nos heic loci non esse sollicitos de pertractanda Luxatione Vertebrarum, tanquam ab interna causa proveniente; quin potius de illa, cui ansam præbuit res quædam externa: Unde etiam pleraque definitionis requisita eo dirigemus. Est igitur Luxatio Vertebrarum earundem contiguitatis solutio, rem aliquam externam accusans, simulque motus voluntarii læsionem inferens.

Genus omni caret difficultate, cum autopsia quemvis evincat, partes antea exactissime sibi invicem respondentes, adeoque contiguas, è loco suo naturali esse propulsas; quod etiam subsequens actionum læsio satis superque demonstrat. De reliquis in Definitione contentis, inferius plura dicenda occurrent, quando de Differentiis peculiarem instituemus sermonem.

VII.

Pergimus igitur ad Subiectum hujus mali, cujus Principale jamdum in Definitione fuit monstratum; vix ergo necesse erit, diu circa Adæquatum ejusdem, utpote quod totum corpus humanum constituit, morari, præsertim illæ corporis partes, quæ per articulationem sunt conjunctæ. Melius fortean erit perspicere, quid proprie Vertebrae sint, aut quid per illas Anatomici indigitare velint, quando de iisdem sermonem instituunt. Quodsi igitur eorundem perlustrabimus scripta, inveniemus Vertebrae communiter vocari ossa illa numero utplurimum triginta, capiti tanquam Supremo Ventri subiecta, in medio excavata, pro libero spinalis medullæ transitu, variis item processibus & foraminibus in gratiam vasorum nervorumque donata.

VIII.

Circa hanc Vertebrae descriptionem adhuc quædam veniunt notanda: quod nimirum Vertebrae proprie sic dictæ seu Legitimæ ordinariè non nisi viginti quatuor inveniantur, videlicet septem colli, duodecim dorsi, & quinque lumborum. Licet Autores confirmant, aliquando in cervice octo fuisse repertas, præsertim apud ejusmodi homines, qui collo longiori sunt instructi. Reliquæ sex à nobis prolatae Vertebrae dicuntur Nothæ sive Spuriæ, quoniam in multis cum reliquis non conveniunt, sed solummodo easdem æmulantur, maximè vero, quia in adultis immobiles notantur. Constituunt verò hæ
verte-

vertebræ Spuriæ os ita dictum Sacrum, & notandum, quod in infantibus laxius, in provectiori autem ætate ita firmiter connectantur, ut unicum os constituere videantur, remanentibus tamen aliquibus distinctionis vestigiis in parte interiori, per levia quædam cartilaginum rudimenta indigitatis. Observarunt quoque Anatomici, quod aliquando quinque solum, rarissime vero septem conspiciantur.

IX.

Nec silentio prætereunda nobis videtur peculiaris articulatio, qua Vertebrae Spinae dorsi gaudent, & Græcè γγγλυμ Latinis vero Articulatio mutua audit, quoniam nempe idem Os ex una parte excipit, ex altera vero etiam excipitur. Plura, qui desiderat, inspiciat librum illum lectu uti dignissimum, ita etiam jucundissimum, sub titulo Ideæ Machinæ Humanæ editum, Magnifici h. t. Rectoris Viri Prænobilissimi, Excellentissimi atque Experientissimi Domini JOH. MAVRICII HOFFMANNI, Phil. & Med. Doct. Chemiæ, Anatomiae & Botan. Prof. Publ. Archiatri Onoldo-Brandenburg. & Solisbaco-Palatini, Reipubl. Noriberg. Phys. Ordinarii & Academiae Naturæ Curiosorum Adjuncti, Heliodorus dicti Celebrissimi, Domini Patroni & Studiorum nostrorum Promotoris omni honoris cultu pie ac submisse devenerandi.

X.

Cum nihil in toto corpore humano observetur, quod non habeat aliquam causam, cui existentiam suam attribuat; ita etiam sese res habet cum Statu præternaturali, & in specie cum affectu nostro: in cujus ideo causas absque majori verborum ambage inquiremus, si prius monuerimus, vix opus imò nec possibile esse distinguere in causam proximam & antecedentem, quemadmodum alias fieri solet in morbis a causa interna enatis. Quem enim fugit, lapsum, ictum, vel aliam violentiam externam constituere ipsissimam affectus nostri causam proximam, nec opus habere aliqua causa anteceden-

cedente, nisi dicere velimus, hominem vel aliud quidpiam, quod vim ejusmodi mediante corpore aliquo duro exercuit, eandem efficere, quod perinde nobis erit. Neque etiam morabimur circa distinctionem inter Causas Naturales, Non-naturales & Præternaturales; præsertim quod res in homine Naturales, ut tales, causæ morborum proprie dici nequeant. Nonnaturales verò ac Præternaturales ex sequentibus innoscescent.

XI.

Causas itaque externas in medium prolaturi, obvenit nobis ante omnia lapsus ex alto, ictus, compressiones & similia: Sic enim cadunt lapides, aliæve res graves, quibus homines quandoque obruuntur. Occasionem etiam ad hunc affectum præbet, nimia vestium cōnstrictio, quod in juveniculis præsertim nonnunquam observatur, motus item nimius vel inordinatus. Neque desunt, qui asserunt, hominem, præsertim infantes & juniores, sibi malum hoc posse conciliare ex mala consuetudine, qualia tamen exempla rarissime notantur. Helmontius originem hujus luxationis ab inæqualitate roboris ipsius spinæ deducit, ob quam Vertebrae in alienum situm distorqueantur, accedente vel externa vel interna quadam vi Archeum substernente, uti ex eodem Dol. in Encyclop. Chirurg. Ration. Lib. II. Cap. VII. §. 6. indigita- vit. Inter causas externas merito suo etiam referri potest incuria quarundam nutricum, cum nempe infantes fasciis nimis arcte vel inæqualiter constringunt, aut ulnis gestant, antequam spina ita sit firmata, ut erecti sedere queant.

XII.

Dubitandum interea non est, multo plures dari causas internas affectum hunc promoventes, quales sunt v. g. intemperies hominis phlegmatica, ex quorundam etiam opinione ætas puerilis ac juvenilis, non tamen penitus excluso virili: cumque juxta nonnullos sexus sequior phlegmaticus statuitur, hinc

hinc est, quod hunc præ virili magis pronum habeant ad præ-
sens malum, pro hæreditario morbo nonnullis venditatur,
ejusque causam vitiosæ uteri conformationi adscribunt. Cer-
tum insuper est, quod causæ ejusmodi internæ ut plurimum
laxitatem ligamentorum concilient, unde mirum non est,
quod ab assumtis cibis flatulentis, viscidis ac facile corrupti-
bilibus laxitas eorum augeatur. Huc etiam pertinent Vigi-
liæ nimix, quoniam notum est, occasione earum concoctio-
nem non modo impediri, verum etiam cruditates cumulari.
De Præternaturalibus nihil dicam, cum alias constet, varia
ad hunc affectum concurrere mala, præprimis Tumores, cir-
ca spinam enati, & ventriculi actio fermentalis læsa, sed hæc
ὡς ἐν παρόδῳ.

XIII.

Accedimus ergo ad Differentias, inter quas primo sese
offert illa, quando alia Vera, alia Notha sive spuria nuncupa-
tur (quæ ultima aliis Subluxatio etiam audit) alia ad exte-
riora, alia ad interiora fit. Ratione loci affecti, quædam in-
fra, quædam supra diaphragma observatur: porro quædam
Luxatio est Vertebrarum Cervicis, quædam Dorsi, quædam
denique Lumborum. A causis desumta differentia, est vel
ab interna vel externa. Modus tandem Luxationis quasdam
suppeditat, quando videmus, quod alia accidat antrorsum,
alia retrorsum, & alia ad latera, & hæc dicta sufficiant de
differentiis nostri Affectus.

XIV.

Cum ad Signa hujus mali nobis progrediendum sit, ope-
ræ pretium erit, juxta communem eorundem divisionem,
(quæ fit in Diagnostica & Prognostica) prius inquirere in il-
la, quæ nobis hunc affectum certo certius patefaciant: hæc
autem omnium optime avtopsia monstrabit: quid enim ob-
stat, quod nonnunquam sola inspectione ægri dicere vel con-

cludere possimus, hunc vel illum laborare Vertebrarum Luxatione, sive deinde introrsum, extrorsum, dextrorsum, sinisterorsum sive alio modo acciderit: ex hoc tamen non sequitur, alia hunc affectum demonstrantia signa esse omittenda, quin potius meo iudicio cum priori rite sunt conferenda. Quod attinet illa signa, quæ autopsia largitur, hoc modo ab invicem discerni queunt, quod, dum e. g. observamus gibbum quendam, sine dubio erit Luxatio extrorsum facta: è contra vero cum cavitas quædam depressa in spina notatur, statim concludimus Luxationem introrsum accidisse.

XV.

His præmissis videbimus, quænam alia signa in notitiam huius morbi nos deducant. Et certe mirum non est, quod illi, quibus Lumborum Vertebrae introrsum fuere propulsæ, sæpius conquerantur de dolore dorsi acerbissimo, nec non circa ventriculum, quem sine dubio extremitates ipsius Vertebrae, partibus dorsi mollibus itemque ventriculi producant: hinc etiam ratio affulget, cur vomitus patiantur crebriores cibique fastidium. Ex eodem fonte fluit, quod statim post lapsum vel ictum ejusmodi patientes incidant in paralyin partium præsertim inferiorum, quam postmodo excrementorum ac urinæ suppressio comitatur. Similem casum observavit & annotavit Gilhelm. Fabric. Hild. in Observationibus suis Chirurgicis. Centur. V. obs. 68.

XVI.

Quoad signa Prognostica, non veremur dicere cum Hildano, inter Luxationes omnium periculosissimam esse illam, quæ in Spina dorsi occurrit. Cum vero & hic una præ altera magis periculosa existat, paucis declarabimus, quid de his sentiendum sit: nimirum quantum ad illam Spinæ dorsi Luxationem, quæ introrsum accidit, & revera completa notatur, facile adstipulari possumus illis, qui eandem pro incurabili

rabili & lethali habent, cum experientia hoc satis superque testetur. Et licet observationes in contrarium prostant, quæ affirmant, aliquando possibile esse, ut Vertebrae introrsum luxatæ, in pristinum locum reduci possint: nihilo tamen minus nobis adhuc scrupulus hæret, an completæ revera fuerint, vel saltem apparenter tales, quod sæpe accidit. Exemplum restitutarum Vertebrarum nobis præbent Ephemerid. Germanorum Decur. I. Anni IV. & V. obs. 77. quod merito suo inter rarissima est numerandum, de quo tamen adhuc dubitari potest, an spinalis medulla in totum fuerit compressa: deinde constat, quod ipsa hæc Luxatio, non uni soli vertebrae acciderit, verum tribus uti Autor expressè prænunciavit, quæ juxta communem Chirurgorum sententiam non tam periculosa est, ac illa quam una tantummodo Vertebra experitur, aliam adhuc hujus farinae observationem annotavit Joh. Nicolaus Binningerus in suis Observationibus & Curationibus Cent. IV. obs. 29. quam, uti & præcedentem humanissime atque fidelissime nobiscum communicavit, Vir Præ-Nobiliss. Experient. atque Excellentiss. DN. JOH. JAC. BAJERVS, Phil. & Med. Doctor, hujusque Professor Publicus, Illustris Reipubl. Norib. Phys. Ordin. Dominus Patronus ac Præceptor noster æternum devenerandus.

XVII.

Pergimus nunc ad aliam Luxationis Vertebrarum speciem, nimirum illam, quæ extrorsum vergit; nec dubitamus, quod Curatio aliqua locum habeat, præprimis si statim ab initio membrum luxatum in pristinum suum locum redigere tentemus: nonnunquam vero & hanc incurabilem observari non est negandum, præsertim si imperitus quidam Chirurgus accesserit, qui nesciat tractare ægrum, nec etiam fundamentis Anatomix sit instructus, ut taceam, quod aliquando inveniuntur, qui licet rem probe calleant, tamen ex commiserati-

one p̄atientis, manum quasi ab operatione retrahant, quod minime fieri deberet: siquidem Celsus inter alia Chirurgi requisita etiam hoc numerare non dubitavit, ut sit animo intrepidus, immisericors &c. Cum aliis Vertebrarum Curationibus, nimirum dextrorsum aut sinistrorsum contingentibus, res eodem redit, adeoque vix opus erit plura his superaddere. Quod vero illam Luxationem concernit, quæ ab interna causa proficiscitur, (quò pertinent Hippocrat. Sect. VI. Aphor. 59. & 60.) aliquando Curatio locum habet, aliquando etiam non, prout circumstantiæ variant rem.

XVIII.

Haftenus fuimus occupati circa Statum hujus affectus indagandum, nunc ordinis ratio nos ducit ad Curationem præsentis morbi, quam etiam ea, qua fieri poterit brevitate proponemus; si prius quædam, Curationem generalem spectantia, præmiserimus, quò postmodum eò felicius progredi nobis liceat, in tradenda speciali quadam, adeoque nostrum morbum concernente, Curatione. Notum quippe est in Luxationibus restituendis generalia quædam locum semper obtinere, quorum primum est Antitasis, quæ idcirco adhibetur, quoniam in omnibus Luxationibus, quemadmodum etiam in fracturis, tendinum quædam contractio contingit, cui aliter succurri nequit, quam extensione membri luxati. Qualia vero hic requirantur Instrumenta, Operationum Chirurgicarum Scriptores monstrabunt, nonnunquam autem solis manibus possunt restitui ægri. Extensionem excipit Mochlevsis, qua mediante articuli in naturalem locum compelluntur. Addunt alii Apothecin, quando membrum ipso facto in sedem pristinam est reductum, quod ex sono vel membri antea luxati munere colligere licet. Denique opus est Deligatura, nisi enim hæc accesserit, membrum repositum facillime excidere rursus posset; hæc autem ita est adornanda, ut neque ni-

mis laxa, neque etiam nimis arcta instituatur: hinc est, quod ex Deligatione solum statim cognoscere possimus, an Chirurgus artem suam probe calleat, nec ne. De figuris fasciarum in genere nihil addere licet, quoniam sæpius variant; hoc tamen plerumque observare solent Chirurghi, ut forma fasciarum cum membri luxati respondeat, quæ regula tamen in multis exceptionem patitur, præsertim in nostro Casu.

XIX.

Hisce jam prælibatis accingimus nos ad specialem nostri morbi Curationem, de qua itidem quædam præmonere libet: scilicet nos heic loci non esse sollicitos de methodo Præservatoria, utpote quæ incongrue dicitur de morbo jam præsentem; neque etiam de Vitali, quoniam hæc ad omnes Indicationes sese extendit, neque peculiarem aliquam classem constituit; omnia enim quæ adhibentur in ægro, ideo adhibentur, ut mediantibus illis Sanitas adeoque Vita recuperetur aut conservetur. Sed de his videatur Propyleum Medicum Magnific. atque Excellent. Domini JACOBI PANCRATII BRVNONIS, Phil. & Med. Doctoris, hujusque Professoris Publici Primarii Celeberrimi & h. t. Decani Spectatissimi, totius Universitatis, nec non Colleg. Medic. Noribergens. Senioris gravissimi, Poliatri Altdorf. meritiss. Domini Patroni & Præceptoris nostri omni observationis & venerationis cultu prosequendi. Quin potius Curationem nostram ad Indicationes duas dirigemus, quarum primaria nititur repositione Vertebrarum loco motarum, altera vero & secundaria absolvitur firmatione earundem per debitam commodamque deligationem. Interea non omittemus quædam etiam ex fonte Pharmaceutico & Diætetico in medium proferre, ubi necessitatis ratio id exiget.

XX.

Initium facimus à fonte, qui dicitur Chirurgicus, ubi post decentem Status Luxationis explorationem obvenit,

commoda ægri supra mensam aut scamnum collocatio , cui etiam accedit , ut vinctulis linteis sub alis & ad ilia cruraque arctè vinciatur , quo postmodo extensio , tam sursum , quam deorsum peragi commode queat. Extensione jam peracta, Chirurgus Vertebrae exterius prominentes , introrsum impellit, tum solis manibus , tum etiam si opus fuerit, instrumentis quibusdam idoneis : & tandem ministri , quibus incumberebat extendere spinam , ab antitaxi sensim remittunt, quo Chirurgus ipsam repositionem perficere possit ; cujus ex voto impetratæ signa esse solent , sonitus vel strepitus acutus & subitaneus , qui auribus percipitur , nec non recuperata luxatæ Vertebrae cum reliquis in situ æqualitas , quam tactus manifestat : accedit remissio doloris & aliorum symptomatum. Hinc deligationem Chirurgus ita debet adaptare , ne Vertebrae rursus excidere , & locum mutare queant : ad hoc vero negotium quandoque requiritur , ut Chirurgus instructus sit spleniis , ferulis aut laminis quibusdam , ad hanc rem accommodatis , quas deinde applicare & circumponere debet , admotis prius congruis emplastris , quorum paulo post mentionem faciemus ; caveat tamen circa ferulas , ne fortius premendo vicinis partibus aliquam molestiam creent. Quibus peractis æger supinus in lecto collocandus , ferulaeque per aliquod temporis spatium relinquendæ , donec Chirurgus certus sit , Vertebrae arctè iterum cum spina cohærere , ut amplius excidere nequeant , citra novam intervenientem violentiam.

XXI.

Sunt autem peculiare quidam Vertebrae in naturalem situm propellendi , modi , à diversis laudati , quos brevitatis studio omittere libet , quoniam potissimum ad variam extensionis enchiresin in omnibus res redit. Singularem præ cæteris indigitavit Senn. ex aliis desumens , quando brachia decussatim pectori injicere præcipiunt , manibus in tergum reflexis,

flexis, quas alius à tergo sedens, genua sua applicans dorso apprehendat, ægrumque hoc modo concutiat, donec strepitus quidam audiatur. Alii etiam manibus ægrum suspendunt, & hinc inde commovent, donec fragorem aliquem percipiant, de quo vid. Taliacot. in Chirurg. Curt. l. 2. & hæc sufficiant de Curatione Luxationis ad externa vergentis.

XXII.

Nunc brevibus ostendamus Curationem luxatarum Vertebrarum versus interna, de qua iudicium nostrum suspendere libet, cum rarissime obtigerit, quod ejusmodi ægri fuerint restituti, ob circumstantias, operationem vel Curam valde impediētes. Quod attinet illum modum, quem ex Ephemeridibus Germanorum in peculiari & superius jam allegata observatione, feliciter adhibitum esse novimus, uti & alterum, de quo ex Binningero, etiam jam citato, constat, sine dubio exempla sunt uti notatu dignissima, ita certè rarissima, nec credimus alium posse eosdem facile imitari, ut taceam, quod raro inveniantur ægri, qui Medico vel Chirurgo, tantam præstent obedientiam, ac illi fecere: & posito aliquando hoc evenisse, quis propterea dicere audet, quod Luxatio Vertebrarum ad interna, in genere considerata, Curationem admittat, à potiori enim fit denominatio.

XXIII.

De Sectione, quam Chirurgi tanquam extremum remedium commendant, ut quædam differamus, sciendum, verum quidem esse, quod juxta Celsum melius sit experiri remedium anceps, quam nullum: interea tamen multa adhuc in casu ejusmodi sunt præsupponenda vel potius præmittenda. Nimirum Chirurgus ante omnia probè perspiciat, an patiens sufficiente adhuc virium robore polleat, ut operationem hanc sustinere absque vitæ dispendio queat: hoc si cognoverit, al- laborare debet, num ægro persuadere valeat, hoc remedii ge- nus

nus subeundi, his deinde perspectis atque observatis, absque mora se accinget ad ipsam Sectionem, hac tamen conditione, ne temerè adstantibus salutarem promittat eventum, cum hoc in potestate sua non semper positum sit, sed quandoque fortunæ attribuendum.

XXIV.

Ipsam autem operationem antecedit Exploratio, qua mediante locus quidam eligitur, qui pro Sectione felicius perficienda aptus sit; hunc si obtinuerunt, solent nonnunquam notare, quo Incisio eo fiat exactior. Hoc facto aggrediuntur ipsam Operationem juxta Hildanum in Observ. Chirurg. Cent. V. obs. 69. hunc in modum descriptam. *Fit nempe primo incisio novacula usq; ad ipsam appendicem Vertebrae descendente, mox per idem vulnus iterum immissa novaculae duae aliae fiant incisiones, una ad dextrum, altera ad sinistrum latus appendicis, deinde tenaculis, ad negotium hoc acceptis, apprehensa appendice trahatur in altum, & reponatur Vertebra in sedem naturalem. Necesse autem est, ut, dum hæc fiunt, spina extensa sit; quoniam hoc modo Vertebra in pristinum locum facilius resilit. Vulnus pro magnitudine dislocationis, aut exiguum, aut magnum infigendum est. Quæ porro veniunt notanda circa tractationem vulneris ex laudato Autore peti possunt, cum prolixum nimis foret, singula proponere: hoc solum addimus, facillimè quidem hæc omnia scribi, difficillime vero exerceri.*

XX.

Transimus ad fontem Pharmaceuticum, cumque morbus noster Operationibus Chirurgicis ferè solis profligetur, non opus erit, multa, ex hoc penu petita, proferre remedia: sunt tamen quædam adminicula, quibus Chirurgus, antequam ipsam aggreditur operationem, instructus esse debet, v. gr. Emplastra, Linimenta atque Fomenta, quorum formulas hac
occa-

occasione adjiciemus. De his autem constat, vix ullum inveniri Chirurgum, qui non peculiarem aliquam compositionem possideat, qua in casu ejusmodi utatur, ut adeo vix operæ pretium requirat, multas addere. Si cui libet, poterit sequens Emplastrum, alias satis laudatum, atque etiam feliciter in supra proposito casu ex Ephem. Germanor. adhibitum, applicare.

℞. resin. ℥vj.
cera ℥iv.
terebinth. ℥x.
gumm. trachacant.
arab. āā ℥ß.
pulv. consolid. major. ℥iß.
barb. capr. ℥iij.
putam. cancr. ℥ij.
aristol. ℥ß.
later. bol. armen. āā ℥j.
terr. sigill. lap. hematit. āā ℥ß.
mum. ℥ij.
oss. human. ust. ℥iß.

Pulv. omnia. F. s. a. Emplastr.

Linimenta etiam quamplurima possent præscribi, prout Medicus hanc vel illam formulam præ altera magis amat, aut expertam habet: Sic Dolæus loco citato sequens commendat

℞. Ol. lumbricor.
chamomill. āā ℥j.
salv. ℥ß.
axung. Cunicul. ℥iß.
bomin. ℥vj.

M. F. Linimentum.

externè inungendum, quo extensio felicius succedat.

Fomenti speciem descripsit Sennert. Lib. V. Part. VI. Cap. V.

R. salv.

alb.

flor. chamemel.

melilot.

hyperic. āā Mj.

Coq. pro Fomento.

Plura his superaddere superfedemus, quoniam formulæ in hoc casu proficuæ in magna copia inveniuntur apud Practicos, unde etiam B. L. eò deducimus.

XXVI.

Neque etiam abstinendum est ab internis, præsertim moderatè diaphoreticis aut sudorem moventibus in casu, ubi ab humiditate nimia ligamenta laxiora evadunt, & sic per consequens, aliqua Luxatio accidere observatur. Ne quid dicam de Confortantibus, sana quippe ratio quemvis edocet, aliter fieri non posse, quam ut æger quotidie, dum lecto affixus hæret, aliquid de viribus suis amittat: multo magis hæc sese patefaciunt, quando repositio Vertebrae Luxatae per Sectionem tentatur, ubi omnino opus est Confortantibus, spirituumque vitalium vigorem promoventibus. Denique etiam aliquando opus habemus ejusmodi remediis, qui tonum partibus restituere, itemque spirituum animalium influxum, antea prohibitum rursus procurare valeant, quibus remediis sine dubio succurrendum erit partibus illis, qui à contusione vel potius compressione hujusmodi nimia affliguntur, qualia exempla in superius allegatis duobus casibus habuimus.

XXVII.

Aggredimur denique fontem Diæteticum, ac cum eodem agmen claudere constituimus; quo vero ordini consulamus, initium faciemus ab Aëre, cujus necessitas in corpore humano tanta est, ut ne quadrantem horæ eo carere absque vitæ discrimine queamus: cum vero duplici modo corpus nostrum afficiat,

afficiat, ambiendo nimirum & inspirando, necesse est, ut eligamus aërem temperatum, adeoque neque nimis calidum, neque etiam nimis frigidum: calidior enim aër ad inflammationes aliaque prava symptomata ansam præbet, cum è contra nimis frigidus varias humorum Stases excitare valet.

Cibus sit boni succi, itemque facilis concoctionis, de potulentis notandum, quod illi, quibus cerevisia suppetit, semper allaborare debeant, ut probè defecata sit, secus autem varia excitat mala, præcipue etiam fenestram huic affectui aperit. Qui vero vino pro potu ordinario utuntur, eligant rubrum, utpote vi quadam adstringente præditum.

Somnus & Vigiliæ in mediocritate consistant, sic enim spiritus in vigore suo retinentur; quod si vero peccemus in excessu vel etiam defectu harum rerum non naturalium, spiritus vel dissipantur, vel cruditates generantur.

Excreta legitimo reddantur tempore, neque diutius retineantur; si autem alvus officio suo non rite fungatur, absque mora ei succurrere oportet remediis laxantibus atque emollientibus.

Sic etiam sese res habet cum Motu & Quiete, quorum diætam ideo commendamus, quoniam constat levisimo etiam Motus præsertim excessu totam Curam destrui posse, præcipue si ab initio statim repositionis is acciderit.

Ultimo nunc accedimus ad animi Pathemata, de quibus experientia loquitur, quod sæpe sæpius atrocissima contraxerit symptomata, si nempe tristiora fuerint; ne dicam, quod aliquando mortem acceleraverint.

XXVIII.

Alius quoque causæ supernaturalis meminit Hild. cit. loc. exemplo 3. de juvene quodam 20. circiter annorum, qui ob conceptam pravam phantasiam, poplitali suo collum spondæ columnæ, ut se strangularet, alligaverat, sic ut sequenti die mortuus inventus, etiamsi collum laqueo constrictum haud fuerit.

fuerit. Hisce finem Dissertationi nostræ Medico-Chirurgicæ imponimus, & DEO tanquam Summo Archiatro gratias agimus, quas debemus, maximas, quod gratia & auxilio Spiritus Sancti sui hac vice adesse voluerit, rogamus etiam atque invocamus Summum Numen, velit impofterum quoque Studiis nostris benedicere, quo omnia vergant ad Sacrosancti Nominis sui gloriam, proximique ægrotantis salutem. Tu quoque B. L. ea, quæ hucusque protulimus, æqui bonique consule, nosque, si forsan alicubi erraverimus, meliori tua informatione dignos cense.

VErtebra quæ recte possit luxata reponi
Hic labor, hoc opus est, hoc docuisse
fat est,
Ut videant alii, modico Te tempore multum
Profecisse, in sacra Arte Machaonia.
Eja age vires ingenii protendere perge,
Sic studii assidui digna brabæa feres.

*Nobil. atq; Clariss. DN. CANDIDATO
l. m. s. scrib.*

**JOH. JACOBVS BAJERVS,
D. & P. P.**

